

## KHUTBAH JUMAAT

### "TUAN YANG TERUTAMA YANG DI-PERTUA NEGERI TONGGAK PEMBANGUNAN DAN KEHARMONIAN NEGERI" (11 Oktober 2024M/ 8 Rabiulakhir 1446H)

---

الْحَمْدُ لِلَّهِ، الْحَمْدُ لِلَّهِ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا  
بِالتَّقْوَى وَالْخُلُقِ الْكَرِيمِ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،  
وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا  
مُحَمَّدٍ وَعَلَى آلِهِ وَصَحْبِهِ أَجْمَعِينَ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ  
الْمُتَّقُونَ.

#### **Kaum muslimin yang dirahmati Allah,**

Marilah kita bersama-sama meningkatkan ketaqwaan kepada Allah *subhanahu wata'ala* dengan menunaikan segala perintah-Nya dan meninggalkan segala larangan-Nya. Semoga kita beroleh kejayaan, kebahagiaan dan keselamatan di dunia dan di akhirat.

Khatib mengingatkan para jemaah agar memberikan sepenuh perhatian kepada khutbah yang disampaikan dan tidak melakukan perkara-perkara yang boleh menghilangkan pahala Jumaat seperti berbual-bual dan menggunakan telefon. Bersempena dengan Sambutan Perayaan Hari Lahir Ke-78 Yang di-Pertua Negeri Sarawak, Tun Pehin Sri Dr Wan Junaidi Tuanku Jaafar, maka pada hari ini, khatib akan membicarakan khutbah yang bertajuk "**Tuan**

## ***Yang Terutama Yang di-Pertua Negeri Tonggak Pembangunan Dan Keharmonian Negeri"*** .

### **Kaum muslimin yang dirahmati Allah,**

Secara fitrahnya, manusia perlu kepada peraturan, undang-undang mahupun keagamaan yang lazimnya disatukan di bawah satu kepimpinan yang dipimpin oleh seorang ketua. Oleh yang demikian, kita rakyat Sarawak bersyukur kepada Allah *subhanahu wata'ala* kerana adanya Tuan Yang Terutama Yang di-Pertua Negeri sebagai pemimpin untuk rakyat bernaung dengan nikmat iman dan ukhuwwah yang menekankan persefahaman dan keharmonian sekaligus memayungi rakyat di Sarawak.

Dalam konteks masyarakat di Sarawak yang berbilang suku kaum dan etnik ini, peranan para pemimpin yang diketuai oleh Tuan Yang Terutama Yang di-Pertua Negeri telah menghasilkan kehidupan yang harmoni dalam kalangan rakyat ke arah membentuk perpaduan bangsa. Ia adalah hasil kebijaksanaan dan keadilan pemimpin dalam mengurus tadbir negeri. Berkaitan dengan hal ini, Allah *subhanahu wata'ala* berfirman dalam Surah an-Nisa', ayat 58 :

﴿ إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ ۚ إِنَّ اللَّهَ نِعِمَّا يَعِظُكُمْ بِهِ ۗ إِنَّ اللَّهَ كَانَ سَمِيعًا بَصِيرًا ﴾

**Maksudnya:** *Sesungguhnya Allah menyuruh kamu supaya menyerahkan segala jenis amanah kepada ahlinya (yang berhak menerimanya), dan apabila kamu menjalankan hukum di antara*

*manusia, (Allah menyuruh) kamu menghukum dengan adil. Sesungguhnya Allah dengan (suruhan-Nya) itu memberi pengajaran yang sebaik-baiknya kepada kamu. Sesungguhnya Allah sentiasa Mendengar, lagi sentiasa Melihat.*

Al-Imam al-Mawardi *rahimahullah* dalam kitabnya *al-Ahkam as-Sultoniyyah wawilayatu ad-Diniyyah* dalam menghuraikan tugas dan tanggungjawab khalifah telah menggariskan beberapa dasar yang wajib dipikul dan dilaksanakan oleh setiap yang bernama pemerintah sesuai dengan kedudukan masing-masing antaranya:

**Pertama:** Memelihara agama Islam, mengenai asasnya yang tetap dan juga tentang perkara-perkara yang telah disepakati oleh ulama'.

**Kedua:** Melaksanakan hukum di antara pihak-pihak yang bertelagah serta menyelesaikan setiap perselisihan yang timbul.

**Ketiga:** Melindungi kehormatan wanita supaya masyarakat terus hidup aman damai.

**Keempat:** Menjalankan setiap hukum dan perintah yang Allah *subhanahu wata'ala* amanahkan kepada manusia agar hak Allah tidak diabaikan dan dapat pula melindungi hak manusia dari kerosakan dan kemusnahan.

Maka dengan sifat dan nilai keadilan serta kebijaksanaan Tuan Yang Terutama Yang di-Pertua Negeri, akan mampu memimpin rakyat ke arah keharmonian dan memacu pembangunan serta kemajuan yang lebih hebat, diredai dan diberkati di sisi Allah *subhanahu wata'ala*.

## **Kaum muslimin yang dirahmati Allah,**

Pembangunan dan kemajuan negeri yang menyeluruh dalam pelbagai aspek kehidupan sama ada ekonomi, sosial, politik dan sebagainya yang dipayungi oleh Tuan Yang Terutama Yang di-Pertua Negeri pastinya akan membawa kepada kemakmuran dan kesejahteraan negeri dan negara. Sebagaimana firman Allah *subhanahu wata'ala* dalam surah al-Baqarah, 126:

وَإِذْ قَالَ إِبْرَاهِيمُ رَبِّ اجْعَلْ هَذَا بَلَدًا آمِنًا وَارْزُقْ أَهْلَهُ مِنَ الثَّمَرَاتِ  
مَنْ آمَنَ مِنْهُمْ بِاللَّهِ وَالْيَوْمِ الْآخِرِ قَالَ وَمَنْ كَفَرَ فَأُمَتِّعُهُ قَلِيلًا ثُمَّ  
أَضْطَرُّهُ إِلَىٰ عَذَابِ النَّارِ وَبِئْسَ الْمَصِيرُ (١٢٦)

**Maksudnya:** *Dan (ingatlah) ketika Nabi Ibrahim berdoa dengan berkata: "Wahai Tuhanku! Jadikanlah (negeri Makkah) ini, negeri yang aman sentosa, dan berikanlah rezeki dari berbagai jenis buah-buahan kepada penduduknya, iaitu orang-orang yang beriman kepada Allah dan hari akhirat di antara mereka". Allah berfirman:" (Permohonanmu itu diterima) tetapi sesiapa yang kufur dan ingkar maka Aku akan beri juga ia bersenang-senang menikmati rezeki itu bagi sementara (di dunia), kemudian Aku memaksanya (dengan menyeretnya) ke azab neraka, dan (itulah) seburuk-buruk tempat kembali"..*

Hal ini jelas menunjukkan bahawa kedudukan Tuan Yang Terutama Yang di-Pertua Negeri telah memperkasa kekuatan bagi menganjak pembangunan ummah yang seimbang antara duniawi dan ukhrawi

dalam pelbagai segi; pembangunan manusia, akal budi, akhlak, agama, dakwah Islam dan juga pembangunan material.

### **Kaum muslimin yang dirahmati Allah,**

Saidina Umar bin al-Khattab *radiallahu anhu* pernah berkata:

*“Tidak ada kejayaan melainkan dengan kekuatan. Tidak ada kekuatan kecuali perpaduan. Tiada perpaduan melainkan dengan keutamaan budi (akhlak mulia). Tidak terdapat keutamaan budi (akhlak mulia) kecuali dalam ajaran agama dan tidak ada agama kecuali dengan dakwah”.*

Justeru, sebagai rakyat, kita perlu memastikan perpaduan dan keharmonian terjaga dalam kalangan masyarakat yang berbilang bangsa dan agama di bawah kepimpinan Tuan Yang Terutama Yang di-Pertua Negeri. Menjaga keharmonian ini penting agar dakwah Islamiah dapat disebarkan dalam suasana harmoni sekaligus memperlihatkan Islam sebagai agama yang harmoni dan penuh kasih sayang. Kedudukan Tuan Yang Terutama Yang di-Pertua Negeri sebagai ketua negeri sekaligus telah memartabatkan dan meninggikan syiar Islam di Sarawak. Allah *subhanahu wata'ala* berfirman dalam Surah al-Nisa', ayat 29:

يَا أَيُّهَا الَّذِينَ ءَامَنُوا لَا تَأْكُلُوا أَمْوَالَكُمْ بَيْنَكُمْ بِالْبُطْلِ إِلَّا أَنْ تَكُونَ تِجَارَةً  
عَنْ تَرَاضٍ مِّنْكُمْ ۖ وَلَا تَقْتُلُوا أَنْفُسَكُمْ ۚ إِنَّ اللَّهَ كَانَ بِكُمْ رَحِيمًا

**Maksudnya:** *Wahai orang yang beriman, Janganlah kamu makan (gunakan) harta-harta kamu sesama kamu dengan jalan yang salah*

*(tipu, judi dan sebagainya), kecuali dengan jalan perniagaan yang dilakukan secara suka sama suka di antara kamu, dan janganlah kamu birbirunuh-bunuhan sesama sendiri. Sesungguhnya Allah sentiasa Mengasihani kamu.*

### **Kaum Muslimin yang dirahmati Allah,**

Pengajaran atau ibrah yang boleh kita ambil daripada khutbah pada hari ini, antaranya ialah :

**Pertama:** Sifat dan nilai keadilan serta kebijaksanaan Tuan Yang Terutama Yang di-Pertua Negeri, akan mencorak pembangunan ummah dan keharmonian negeri serta memacu pembangunan dan kemajuan yang lebih hebat, diredai dan diberkati di sisi Allah *subhanahu wata'ala*.

**Kedua:** Tuan Yang Terutama Yang di-Pertua Negeri adalah umpama payung kepada rakyat dalam memperkukuhkan keharmonian dan kesejahteraan rakyat.

**Ketiga:** Sebagai rakyat juga, kita bertanggungjawab menyerahkan taat setia kita kepada Tuan Yang Terutama Yang di-Pertua Negeri agar pentadbiran dan pemerintahan Tuan Yang Terutama Yang di-Pertua Negeri dapat dijalankan dengan lancar dan menyeluruh kepada seluruh rakyat.

Bersempena dengan sambutan rasmi Hari Lahir Ke-78 Yang di-Pertua Negeri Sarawak, pada 10 hingga 13 Oktober 2024, marilah kita bersama-sama mendoakan semoga Tuan Yang Terutama Yang di-pertua Negeri Sarawak sentiasa di bawah payung rahmat Ilahi,

diteguh keimanan, dilanjutkan usia, dikurniakan kesihatan dan kesejahteraan. Semoga Tuan Yang Terutama dikurniakan taufik dan hidayah serta kekuatan untuk meneruskan pemerintahan negeri. Kita doakan juga agar Sarawak dikekalkan nikmat kestabilan politik dan keamanan, dijauhkan dari segala perbuatan jahat dan fitnah yang boleh membawa malapetaka dan kehancuran, dikukuhkan perpaduan dalam kalangan rakyat semoga sentiasa hidup aman damai, menikmati keadilan, kemakmuran dan keselamatan sepanjang zaman.

Akhirnya, marilah kita bersama-sama menghayati firman Allah *subhanahu wata'ala* di dalam surah al-Anfal, ayat 63:

أَعُوذُ بِاللَّهِ مِنَ الشَّيْطَانِ الرَّجِيمِ  
وَأَلَّفَ بَيْنَ قُلُوبِهِمْ ۚ لَوْ أَنفَقْتَ مَا فِي الْأَرْضِ جَمِيعًا مَّا أَلَّفْتَ بَيْنَ قُلُوبِهِمْ  
وَلَكِنَّ اللَّهَ أَلَّفَ بَيْنَهُمْ ۚ إِنَّهُ عَزِيزٌ حَكِيمٌ

**Maksudnya:** *Dan (Dia lah) yang menyatu-padukan di antara hati mereka (yang beriman itu). Kalaulah engkau belanjakan segala (harta benda) yang ada di bumi, nescaya engkau tidak dapat juga menyatu-padukan di antara hati mereka, akan tetapi Allah telah menyatu-padukan di antara (hati) mereka. Sesungguhnya Ia Maha Kuasa, lagi Maha Bijaksana.*

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ  
وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ  
قَوْلِي هَذَا، وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ  
وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.



## KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ،  
فِيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ.

### **Kaum muslimin yang dirahmati Allah,**

Pada kesempatan ini, khatib menyeru agar kita bersama-sama terus mengimarahkan masjid dengan melaksanakan solat fardu secara berjemaah yang ganjarannya amat besar sehingga 27 kali ganda berbanding solat secara bersendirian. Selain itu, pastikan makanan yang diambil adalah yang diyakini halal lagi baik agar kehidupan kita diberkati dan dimakbulkan segala doa kita.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ  
وَسَلِّمُوا تَسْلِيمًا

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ  
عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ  
وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ  
سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمَهْدِيِّينَ، سَادَاتِنَا أَبِي بَكْرٍ وَعُمَرَ  
وَعُثْمَانَ وَعَلِيٍّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.  
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ  
وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah! Bantulah saudara-saudara kami di mana sahaja mereka berada, khususnya di negara Palestin. Kurniakanlah kepada mereka perlindungan, keselamatan dan kemenangan dalam menghadapi musuh-musuh nyata mereka. Angkatkanlah daripada mereka bala bencana, peperangan dan permusuhan dengan limpah rahmat-Mu, Tuhan yang Maha Rahmat.

Ya Allah, ampunilah dosa-dosa dan kesalahan kami, ibu bapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah, Ya Rahman, Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah, hindarkanlah kami daripada melakukan rasuah dan pelanggaran kepada peraturan dan undang-undang serta penyalahgunaan dadah. Kurniakanlah keselamatan dan

kesejahteraan, jadikanlah kami ummah yang berkualiti dan berintegriti demi mencapai negara yang aman dan makmur serta mendapat perlindungan-Mu, ya Allah.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Limpahkanlah ke atas kami nikmat keselamatan, kesihatan dan keafiatan serta hindarilah kami daripada segala wabak penyakit.

رَبَّنَا أُنْتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،  
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ عَنِ  
الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ  
يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِكُمْ. وَلَذِكْرُ  
اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.